

要緊在念佛的是誰？回光返照、深入疑情，若話頭不得力，還提前文，以至末句，使首尾一貫，方有頭緒，可致疑也。疑情不斷，切切用心，不覺舉步翻身，打箇懸空筋斗，卻再來喫棒。

空谷隆禪師示眾

不可默蠢蠢地念箇話頭，亦不可推詳計較，但時中憤然要明此事，忽爾懸崖撒手，打箇翻身，方見孤明歷歷。到此不可耽著，還有腦後一槌，極是難透，你且恁麼參去。

不參自悟，上古或有之，自餘未有不從力參而得悟者。

優曇和尚令提念佛的是誰？汝今不必用此等法，只平常念去，但念不忘，忽然觸境遇緣，打著轉身一句，始知寂光淨土不離此處，阿彌陀佛不越自心。

評曰：但時中憤然要明此事，此句甚妙，該攝看話頭之法曲盡。